

四庫全書

集部

欽定四庫全書

集部

斐然集卷五至七

詳校官贊善_臣朱紱

主事_臣呂雲棟覆勘

總校官編修_臣王燕緒

校對官編修_臣李堯棟

謄錄監生_臣王鉞

欽定四庫全書

斐然集卷五

宋 胡寅 撰

和仲固春日村居即事十二絕

臨流負嶽百年居
手植松楠合抱株
傳寫春光入詩句
味之如對輞川圖

有興相尋即扣門
不須招致簡書繁
試從大雅歌鶯谷
未羨詞人侈兔園

欲駐長春學道家如何白雪是黃芽聊憑高士五株柳
為問仙人三朶花

舊花一一斬新春慰薦經行自在身且使緩開常照眼
莫教輕墮恐傷神

西園聞道徑封苔落落髯仙去不回安石中年離索意
吾徒笑口且頻開

春半曾無決定晴今朝初上九天明檻花莞爾窺人意
林鳥嚶然求友聲

陶公春日事西疇不是同羣沮溺流君亦荷鋤貪雨足
誰知幽意在滄洲

仙居何異武陵溪泛出殘紅春水肥擬欲沂流兼載酒
應容艇子傍苔磯

籜龍本是飛天物養鱉宜充照席珍一飯午窗春睡起
羲皇而上更何人

栽培君子要添丁護惜龍兒出錦棚莫學當年饒太守
直須脫粟伴藜羹

正眼如君了了明未嘗沉醉本來醒自將周易規兒輩
白馬空傳一藏經

似聞寂寂帶經鋤老圃何知莫問渠況是漢陰機事息
豈憂芳草翳嘉蔬

題翁道人竹軒

寄語東陽翁道人開軒種竹意何親經春又看龍孫上
晚歲寧憂鳳食貧風月肯來聊競爽塵囂不到獨相親
何時拄杖敲門去若比王猷懶更真

題斯行厚親庵世祀閣二首

軒冕身猶寄金帛意不存永懷三釜樂當把一經繙靜
室依松栢清規遺子孫里仁如長者真使薄夫敦
不用登臨趣憑高心重催龐公勤上冢東暫更循陔羊
棗終身慕我蒿鞠子哀年年拜寒食豈但數雲來

贈李子揚

洛社看花各妙年那知關塞起狼烟舊遊只有山川在
佳政時聞嶺嶠傳對酒解歡吾老矣登高能賦子依然

不忘難泰平生約更泛瀟湘下水船

和彥達落梅

戊辰

為問東風有底忙吹成疎雪洒林塘應知刺馥歸香骨
誰拾殘英試粉粧安得反魂三折臂漫披能賦九迴腸
枝間賴有青青子不遣行人折過牆

簡奇父

累旬不見孫夫子聞學神農闔戶眠藥物諒能收近效
精神應復類癪仙欲趨丈室求高論恐費華池溉下田

指日春風動花柳也須乘興慕斜川

從趙廟求菖蒲

欲從蒲澗問安期仙事茫茫不可知
何許寸根仍概節
解教霜鬢却青絲
風流公子蒞蘭伴
憔悴騷人香草詩
乞取蕭疎映窗几
蒼然常揖歲寒姿

和趙榮州

兵戎睽隔幾春秋
又向南州話北州
一飯識君塵外趣
三川回首夢中游
可堪麗藻相華寵
自斷沉疴合罷休

安得卜隣如二老杖藜來往亦風流

和奇父二首

示病維摩體暫癰習間中散禮誠疎已知道義能相與
故使情交得自如前日又欣揮麈尾何時重見命巾車
棲遲甘就衡門下不見龍章卧草廬

其二

丈室虛明了不局寸田蕪廢正須耕容顏半數年華改
品目猶煩月旦評洗礪子荆真可慕中庸伯始竟何成

且將禮節規兒輩不止文書記姓名

和洪秀才八首

杖策紛紛是誰能志大猷
猶衣與糲飯長夏及清秋
辯論輕三耳齋明見兩眸
聖門多要妙文藝不須游

二

自昔超羣者無非遠大猷
要令心似鏡莫遣氣橫秋
末學多牆面深窺異瞽眸
君看顏氏子何以過商游

三

愛酒希元亮敲門重子猷孤松將秀嶺萬竹已搖秋懶
去手搔髮興來書映眸此生當皎皎毋作夢中游

四

于今聞議論自昔際風猷勁栢君凌雪衰蒲我望秋讀
書欽滿腹歌舞倦回眸豈但人稱善無慚馬少游

五

栽花為事業種秫是謀猷不羨兩蝸角從教雙鬢秋登
樓山抹黛垂釣水澄眸此樂應誰侶雪風昔從游

六

鄙人聞道晚何以播芳猷未就三年刻還驚一葉秋論
交無白足對客有青眸之子懷仙趣相期汗漫游

七

有煩推後覺未克繼先猷痼疾資醫緩心專慕奕秋遠
遊方策足參倚在凝眸更仗磋磨力時時警惰游

八

聞說頻頻黨深遵秩秩猷題評歸月旦裁鑑比陽秋賦

謝雕蟲手詩通美盼眸看君多直諒端似漢朱游

示法輪長老

人間膏火日烹煎塵外光陰可判年路轉峯回能幾許
鳥啼花發故依然同遊多病空攜酒相對忘機不話禪
請撤溪橋休送客却須多種遠公蓮

題樟源嶺下老嫗井欄嫗百五歲

己巳

嘻嘻呀呀三伏中投鞭拭汗一畝宮銅瓶擊深響磴
翠綆引重聲墻東雪花下咽肌骨醒風腋泛駕仙靈通

百年老嫗羽化久名與甘井垂無窮

和楊秀才二首

林下何所樂放懷天地中青山供客眼明月與君同靜
聽蕉窗雨間披芟沼風未忘蒿目意時一夢周公

其二

林下何所樂遊心書史中時窺言語外默想聖賢同沂
水有餘詠舞雩多好風區區守一介未肯易三公

和仁仲

岩壑風烟可寫憂千竿筠玉淨脩脩弟兄無故兼三樂
杯棗相歡第一秋豈似墨卿夸楚澤最宜從事到青州
胸中固自春風在小試安能學太丘

示延平日者

萬物森然播大鈞一言鈎訣妙通神捲簾與客談忠孝
袖手觀時任屈伸燕石勒名應有日凌烟圖像果何人
且從冠蓋林中看莫滯天涯與水濱

紹興壬子六月先公再被掖垣之命某時侍行自

清江登舟經祖印江口趨行在所未幾罷歸還憩
豐城之龍澤寺明年初夏歸隱南山己巳歲予
偶遊祖印畱宿寺僧惠嵩能道昔寓龍澤之梗
概兩寺相望蓋五十里時先公沒十有二年矣
予亦衰病投紱俯仰悲慨因成兩詩以遺嵩

雲歸龍澤寺風引墨池船誰識行藏妙空驚歲序遷從
行矜壯齒撫事嘆華顛約略人間世耆僧亦憮然

二

車騎紛來去，帆檣競泝沄。
雲間天淡淡，江靜竹娟娟。
恥學飛騰術，慵參寂滅禪。
春風常滿意，無處不怡然。

宿餘干臨江高寺題清音寺

閒身何事有塵勞，
憩息欣逢一榻高。
灑水轉灣如玉玦，
曲洲斜抱記檀槽。
凭欄偶見飛鴻翼，
對酒仍持紫蟹螯。
疇昔未觀東匯澤，
片帆聊欲駕洪濤。

題中元觀次黎才翁韻

掛了衣冠却問農，
幾回欹枕聽晨鐘。
壯懷不與浮雲渺，

宿疹猶資大藥功想像濠梁寧有趣
追尋風馭豈無蹤
道人要識春臺樂須向壺公問所從

十二月餘醺盛開

不虞集霰與飛霜可但寒梅度暗香
翠碧重敷秋後葉
玉明爭絢曉來粧應憐高架裊清艷誰道踈條無妙芳
折向清尊沾賸馥與君冬日對春陽

和仁仲治圃三首

扶持嘉樹起條枚未覺風前齒髮頽
深鑿坐邀千澗水

縱觀如步九層臺雲間秀巘濃還淡案上陳編闔又開
莫似昔賢誇獨樂與人同處首應回

二

不遣身心同槁灰化工隨手自量裁一欄仙鶴端倪露
九畹崇蘭次第栽生意可觀那畫得暗香難覓偶吹來
柴門漫說何曾閉俗駕經過也未猜

三

憤瞫年來藥漸須喜君猶自手抄書塵冠固合懸圻壁

羽扇何當出草廬勝景但逢詩發遣壯懷聊用酒驅除
寄身擾擾膠膠者奇貨從來不可居

謫居新昌過黃巖嶺

庚午

昔年曾作守旌騎擁山頭省已無遺愛投荒歷舊遊妻
兒相翼衛風雨漫淹留力學如何驗仁人乃不憂

遊龍山寺六祖故居也

范陽盧以仕南遷卜宅空山不計年間氣有鍾起象類
美材無匠制方圓誰能判斷風旛話等是追隨粥飯緣

攜客同來又同去浮屠依舊插蒼烟

次劉坦見和

君以苛留我罪遷鄉情相值且忘年歸心莫共孤雲遠
定性當如皓月圓沂水舞雩方有詠曹溪尋派即無緣
向來策杖經行地不礙渾如石壁烟

喜雨

聞說頻年旱先懷併日憂家書不易到困米諒難求一
雨連三夕千倉裕九秋若為知帝力鼓腹聽蠻謳

治園二首

涉圃親鋤草分畦
膳種蔬潤通隣沼
近色映野雲虛瘴
重難求藥心間易
看書但令羹有桼
那嘆食無魚

其二

漿蕝瑶英體蕪菁
翠羽叢壓黃千葉
韭競秀一畦葱
滄滄金莖露翻翻
玉宇風不忘藏
聚力醢醬有無同

喜義卿得子端倅攝新守

喜樂民宜甚平反
笑屢春故應熊夢
協還見鳳毛新桂

籍他年繼桑弧舊俗因豈無湯餅會也合到窮賓

和郡將勸農

仁政惟敦本躬行豈好夸舞停衫颺雪盤藉綺如霞童
馬爭騎竹村厖息吠花向來觀饁地和氣滿家家

酬黃執禮見和

聞從軺車出勤農不務夸歡謠驅宿霧飛蓋亂晨霞醉
偃風前艸詩裝錦上花也將求二頃輸稅補公家

再美勸農

邦本古攸重民天辭匪夸詎能皆辟穀漫道獨餐霞一笑為良繭力耕無賣花信知幽七月于邦起周家

觀諸人唱和

五言雖窘步才力競雄夸壑聳千章木霄霏五色霞聲諧金擲地夢到筆生花豈謂明珠貫清輝照鄙家

和王維三首

辛未

老矣雞栖愛一廛生涯隨分不求全一杯那復思身後三爵聊將補食前

素不能詩復戒吟辱君笙鶴墮清音何須風月三千首
已洗塵埃一寸心

蓬門相直是南山傍着丹梯尚可攀野興舊同流水遠
道心今共白雲間

和黃執禮六首

稅得東家一畝宮向來喧市馬牛風誓將尤悔加深省
肯為飢寒嘆屢空十里溪山愁眼外數家梧竹畫屏中
惠然更感無雙子時有高談發蔽蒙

二

賜牆那及仲尼宮
妄意堅高立下風
志士有求雖汲汲
鄙夫無得漫空空
詩鳴寡學安能善
酒聖多愁詎敢中
惟賴有朋想博約
過情之譽豈宜蒙

三

浮生均是大槐宮
永日聊便竹簟風
若要語言求要妙
猶將筆墨畫虛空
一區聊寄塵囂外
萬景皆歸眺望中
敢似越雞爭鵲卵
正慚雲將問鴻蒙

四

律呂旋相六十宮聲如佳句比南風自非詩印全提得
難使言瑕一洗空已向襟靈窺致遠更從彪炳見彌中
讀書有益非虛語請看孫權與阿蒙

五

尚德南宮勇北宮羨君兼有古人風無雙自昔稱江夏
第一于今鄙解空會友更求三以上策名應造二之中
須慚類語賡黃絹但可厨人作醬蒙

六

文才久合步蟾宮未肯爭搏九萬風
騰欲論詩宗典樂故應憐我隸司空
高山宛在綠琴裏白髮從多清鏡中
要識起予真賞意聖門千古望龜蒙

送茶與執禮以詩來謝和之

簞瓢曾不飽顏回何事新茶轉海來
八餅尚懷經幄賜一芭聊對嶺雲開
分君要使澆書腹待客應須罷酒壘
自笑玉川空兩腋清風無夢到蓬萊

黃倅生日送茶壽之

北苑仙芽紫玉方
年年包篚貢甘香
願君飲罷風生腋
飛到蓬萊日月長

和李靖

三間茅屋陋無人
聊著投荒罪垢身
此地相逢應有數
他年重見復何因
雅騷我豈堪嘉贈
逸足君宜據要津
更把一尊當雨霽
坐看永鑑拓秋旻

寄題趙化州清白亭

聞話維城刺史尊關西夫子是師門太清不取班超論
堅白寧同惠子言斐几蕭然心似寄銀鈎精甚勢如騫
政成歸報蘧廬子常使甘棠庇本根

和黃倅祈求有應

海山和氣四時連太守賓僚自十仙明恕而行非苟爾
感通之效固昭然萌心甘澤雲從地舉意晴暘日麗天

可但南冠瓶有粟家家酣詠太平年

新州有十仙圖謂
州縣官只十員

又和錦阜登高

久廢危亭也待時俄然榱棟出鉉基已應氣象軒城表
更覺登臨冠海湄萬里秋風宜落帽四并高會稱傳卮
幽人但把東籬菊坐看南山久未移

再和前韻本欲創亭以獲時而止

不因修築廢農時欲以仁心翊化基野草從來豐可藉
量陂元自渺無湄登臨有愜三楹鼓衰病多慚一斗卮
獨喜高秋對黃菊風吹烏帽看雲移

和陳生三首

此道存亡仁不仁遺編所載豈其真若非象外冥心契
寧向環中得意新玉塵有文堪悟道錦囊無句不藏春
簞瓢倘可分留客更欲聞君一語親

二

車塵馬足兩紛綸談叟渾如谷口真閑裏光陰渠不駐
靜中滋味我嘗新高眠展轉三竿日熟飲頻煩一甕春
請看真畦勞瘁者歲寒當與子相親

三

掛却衣冠把釣綸那知臆拙未全真
餘生意態無相顧未死工夫有自新
弦絕誰傳流水曲瑟希曾對舞雩春
晚交况得陳丘子不但波瀾子建親

示程生二首

利域名途較少多人生那用學燈蛾
如君甘作長貧士視古寧慚獨行科
鶴可羅時煩寵顧鳶嘗跼處重經過
扁舟又指閩山隱奈此蒼涼別意何

二

柴桑風度極清真地位當齊古逸民不為兒曹營飽暖
聊將詩句寫經綸喜君自得超遙趣與世相忘寂寞濱
正欲細論嗟遽別空慙祖謝響然臻

和單普二首

能向詞江挹彼清愛君詩句早知名百家懸鏡知妍醜
一字提衡有重輕畫諾豈淹三友益簡才方廓四聰明
肯臨鄙屋相輝映自愧常談只老生

棄捐孤陋與誰隣
插棘誅茅漫隱淪
亂思詩書隨手揭
慰懷風月逐時新
慚無用舍行藏道
有愧東西南北人
久矣筆端塵土暗
因君聊復擬心神

謝朱推梅栽

壬申

南國雖云有學堂
了無松菊徑徒荒
瘴痕元愛冰花洗
衰鬢聊依玉樹芳
便覺小池招秀影
更令寒月映新粧
從今賸醞萸香酒
指擬春風摘子嘗

示臨川曾草

闕里三千盛參乎一唯優古來宗德業誰復繼風猷晚
派南豐衍賢名內相尤高文推大手與學擅前修有美
清江彥胡為瘴嶺陬宗盟標姓望海若富源流侯館甘
魚食賓筵聽鹿呦會須題雁塔聊敞貂裘美玉宜深
韞明珠謝暗投自嗟鳶跼墮空羨鶴夷猶三釜古云樂
一簞今漫憂但令心了了那畏力仇仇繫馬行雲淨飛
觴梅雪稠愧君相屬厚弱水詎勝舟

寄陳生

窮冬纔得雨稍稍梅已無餘柳漸包且把簡編遮病眼
時拖衾絮擁寒骹譏訶駁雜懷張籍聯續詩章憶孟郊
歸卧蕭齋諒安穩可無消息到衡茅

謝趙戎惠白菰甚腴且再求之

已是居無竹那堪食一簞煩君餉園茹使我助盤餐秀
色春風早甘肥曉露溥美材今又闕小摘更相寬

送黃熙赴韶推

羸金不取義方嚴孝友家庭嶺海膽力古共推經笥富

決科爭看筆鋒鈇才非俗契心難展清畏人知德尚潛
鵬翼垂天終九萬固應鳬鳥未能淹

送黃權守歸八桂三首

展驥官良是憑熊職未專中和已成頌清淨豈無傳樓
牕環新堞丁黃溢舊編聖朝方考績華寵定頒宣

二

樂物羈栖伴筋骸放逐餘自甘門有雀寧嘆食無魚傾
蓋情文腆投醪笑語舒晚途多感慨賴此得時祛

三

兩岸溪紋感風亭柳帶縈借留無上策送別有兼程望
杳雲間旆班餘野外荆路從簪玉去增我故山情

迂黃守再來二首

舊治重臨寵渥新聖朝因任慰斯民芾棠不拜陰如幄
騎竹爭迎氣似春金重百斤兼賜爵車高一丈更施茵
能名籍甚宜蒙此賴水廬溪共演深

柴扉雖設悄無隣聽說君來氣又振鷗鷺點開愁意思

詩書吟起病精神也知憔悴嫌杯酒可尚談諧對席珍
旌旆悠悠將入眼爭除三徑待朱輪

和黃秀才

羹藜飯糗自無餘身世蕭條亦自如十里溪山連枕席
一堂風月伴琴書畹蘭幸襲仙人佩徑草欣承長者車
四海弟兄非浪語先生何恨九夷居

寒食日約蔡生以雨不至

細雨斜風惱弄春荒郊不見踏青人傷心湖外松楸域

弔影天涯露電身
楊柳杏花何處好
石泉槐火一時新
舉杯幸有君相屬
更待泥乾步屨勻

謝蔡生見和

三分已過二分春
尚想綿田一善人
冷食未平千載恨
浮雲何與百年身
從教對雨攜壺阻
自愛觀風得句新
芍藥酴醾無復見
花林芳草翠初勻

二弟在遠經年無書
張倩忽來相看
蔡生以詩見

慶次其韻

鴻雁分飛接翼難
稻粱謀隔水雲寒
千山路遠勞魂夢
一紙書來強笑歡
東榻人材慚潤玉
西崑詩韻勝芳蘭
從今更勵男兒操
金鐵為心石作肝

病中有感

武侯輔世侔伊尹
明道傳心繼孟軻
五十四年而已矣
小儒如此豈非多

送英州推官

素業平生筆硯交
簷官何事管榜敲
自傷放逐生中熱

時對清風解外膠
挾藻更窺青玉案
分甘常記綠羅袍
扁舟北上英州幕
卜吉應逢泰拔茅

和單令

炎州暑令比烝炊
茅屋深更未掩扉
倦鵲繞林飛又上
流螢照水亂還稀
寡尤正爾三緘口
新浴又思一振衣
獨怯詩壇把麾將
欲摩堅壘費攻圍

和周尉遊簡園

敝屣稀行故不穿
荒陬何處賞芳妍
詩人邂逅能乘興

野客勤劬便肆筵滿壁畫圖俱儼若一川風物更蕭然
攀翻百樹梨花雪醉擬春風二月天

簡單令

十月絺無斃中冬木尚榮願為寒玉佩思灌閭風清之
子牛刀暇尋餘免徑行已攜從事至旋覺大庖盈荒郡
書雲節虛簷寫雨聲寂寥無一事浩蕩有閒情草樹環

居密雲山極望平羈愁添繡線鄉味得金橙獨酌臨空
迴高歌徹晦明醉惟凭曲几窮不念方兄詩怕吟來拙

書便讀後精紋楸忘勝負綠綺混虧成忽見江梅蕊如
披瑞雪英旅中相慰薦箇裏自分明更待塗茨了仍看
藝竹生茅柴如可壓為吾糝藜羹

周尉以詩致雪鱸次韻為謝

新興何事憶吳興因話鱸魚割素鱗不是南烹無口實
要看西子授廚人堆盤雪縷開花面泛艇秋風想釣綸
玉醴浮來為鄉導金橙研破助芳辛老饕難繼蘇公賦
一飽鮮腴敢更頻

再謝見寄

非關糧盡不能興自嘆車中蹭蹬鱗詩客頗能憐逐客
饔人知復受鮫人為憐飛箸千條玉不忘牽潭百尺綸
腹似鼓輦無塌處詩如薑蒜有餘辛閩鄉少府新權爾
爭比周郎美味頻

周尉丹砂次其韻

日鑪蒼浪鬢還童意未賒易衰如下阪難熟似烝砂不
信三峯妄曾聞九轉誇刀圭何太少薏苡舊盈車

和周尉立春二首

筮易欣逢天地交，送殘寒暑石光敲。
化工造物初施手，天仗迎春已在郊。
一飯及辰堆細菜，千花從此放香苞。
欲賡妙句無餘味，久矣庖人不治庖。

其二

新年仍復得詩交，和氣排門不待敲。
藏谷寒冰猶北陸，應時甘雨背西郊。
松筠挺挺浮烟色，桃杏紛紛拆繡苞。
準擬尋春多酒肆，芳羶何必費良庖。

用前韻簡單令

斑白欣逢子墨交，懸知琴化息榜敲。
不從凍芋窺侯喜，端向長松倚孟郊。
竄逐自甘藜不糝，太平還見葦方苞。
金牛妙割須君手，笑我鉛刀似族庖。

謝周尉用前韻致丹砂且見勸葆真

寒衾未暖睫先交，曉漏那聞促點敲。
非有真丹存下海，詎同和氣滿春郊。
王弘頗亦知陶令，仲達何勞誚石苞。
為報邇來幽意愜，籜龍拳驚漸充庖。

李簿攜具用前韻和之

春禽遭凍息交交不及風箏迭遞敲睡起依然開白屋
客來仍是俯青郊方兄無勢寧能熱窮鬼多羞祇自苞
載酒封羊煩厚意當年莘野尚烹庖

和單令春日

新厯自披展故交誰與歡顏容羞把鏡菰韭強登盤袖
手籠東老侵肌料峭寒大鈞方播物吾道豈艱難

金沙

海棠開後數金沙誰料炎荒有此花青玉案頭張重錦
碧雲堆裏漏彤霞高枝已寫清尊照嫩藥猶須翠幕遮
未信東風肯吹謝且教遊客看繁華

簡單周二子

回首清明遠矣哉和風還挾袂辰來麗人空憶行歌樂
曲水難追翰墨才鬢髮飄蕭吾自祓形骸放蕩孰相開
早知勝集荷塘上何不飛觴看恥壘

音塵踈濶思悠哉有底恁恁不我來陳合鸛鵲須敵手

詩成珠玉要奇才
新荷雨定如蘭馥
曲沼風閒作鏡開
况是涼蟾方半壁
清光應欲照金罍

簡單令

炰炊不奈瘴氛侵
一霎微涼屬晚陰
自軸疎簷掃堦砌
却憑安几看雲林
風中梧竹旌幢亂
雨外江山水墨深
來日小槽窮醜白
眷言騷客肯相臨

楊尉見招朱推單令與焉月色甚佳

南郭無緣到北城
却因招喚得同行
四郊禾黍未全熟

滿眼雲山何限情幸有好風能洒袂况無間事稱揮觥
藍輿欲去留還佳愛此月涼河漢明

七月十八日與諸人集真于燕譽堂

盍簪相與記春芳落去爭如桂影香故覓層臺延曠望
可無尊酒泛寒光交揮玉麈傾懷盡半仄冰輪耿夜長
坐到銀河分曉色彤霞金暈更蒼涼

吳守祈雨有應

延陵宿望冠三吳又見熙朝老大夫善政舊聞風偃草

清規今信浦還珠山川每應精神禱未稼全憑潤澤蘇
可但邦人歌五袴也知還客慰焦枯

和單令自龍山迎月而歸

招提爐上寶香氤問信浮屠作祖人想得妙心同水鏡
故應歸路見冰輪清輝萬里無窮雪淨觀千山不隔塵
欲識新詩惟累句頗慚曹植與君親

重九簡單令

殊方令節也堪憐可詠江涵雁影篇買得紫萸虛市裏

種成黃菊小池邊相逢便是華胥國一醉寧慚玳瑁筵
何必登臨追舊俗南山秋氣自超然

和單令

朝雨催寒細似毛賓鴻帶影朔雲高菊萸不分簪華髮
醪酒無因拜赭袍笑我功名如墮甌愛君情義比投膠
病衰阻赴芙蓉約木末寒飈獨詠騷

吳守生朝

十月二十日

梅信初傳冬未深高門熊夢慶相尋三朝耆舊人皆仰

一德純全衆所欽難老椿齡方演迤後凋松色正陰森
願公常記茱萸釀每歲茲辰細細斟

和蔡生遷居二首蔡學佛故用杜老與贊公故事蔡

常令一姬持簡來

浮生何處不蘧廬且喜飄然乍卜居一室未應忘洒掃
四隣聊復認親疎荔蕉餉客還堪飽笋蕨登盤莫顧餘
有意相尋即扶杖無煩赤足致雙魚

一壺村酒要同嘗脯醢殖有取次將談話翠微修竹徑

追隨斜照晚風岡梅花淡淡傳春意柳色依依作歲陽
只麼往來成樂土豈知身世落南荒

和單令除夕二首

又聞幽谷有鶯遷況復山晴花向然泥犢戒耕呈歲歲
戶靈呵鬼換年年茅簷賸有三竿日林地曾無二頃田
且買東江百花酒與君同棹十分船

坐閱流年同擲梭未曾聞道合如何擊壺安用鐵如意
愛酒猶須金叵羅重讀幽詩賸節物還師魯聖對鄉儼

東風漸次開桃李之子寧能不我過

新春即事二首

竹爆臘寒盡桃符春事來和風已披拂暖日便徘徊
曳杖間挑菜攀枝齏摘梅太牢雖有味豈必勝登臺

二

恰賦春還柳俄聞地出雷雨絲分織作風
籟急喧歷寂寂爐無火欣欣甕有醅
臨寒插羔裘雪觀亦悠哉

同蔣教授單令訪竹里

遲日芳郊路寒暄氣已分共尋茅屋趣一醉竹光雲蘊
藉潘懷縣清修鄭廣文衰遲亦何幸併得友多聞

即事

梧葉經冬不識霜杞茅蒙潤已宜湯夜除愛日太和境
衣袂輕風單薄裝盤綰翠絲春意近盞浮清艷臘容光
東君又試芳菲手行樂寧嗟鬢轉蒼

次德施見和

頭如衰葆更加霜身似陳茶不奈湯春服又陪曾點詠

歸心尤美陸生裝山川浮動風雲氣草木欣榮日月光
賸種雞頭剥溫軟不教無齒愧張蒼

和單令

曾步雩風詠晚春肯教清鏡受纖塵詩書漸與心為一
文字終慚筆有神奕局不爭先後手醉鄉常值聖賢人
得時花卉千千狀須倩能詩為寫真

送朱推于水東口

送客水東口散襟城北頭清風正駘蕩細雨忽飛浮荒

傳少來燕平田多乳鳩何時理歸棹橫笛下滄洲

和德施賞金沙

籠紗未暗塵錦幄又經春有艷曉酣酒無言時惱人後
先爭絢倩開落自仍頻相對長松樹香心結蘂新

令節即事簡晞仲德施

寒食清明節令佳禁烟遺俗渺天涯清醇只向丹田暖
料峭猶煩翠幕遮長短驟看森雨笋高低難覓旋風花
小齋寂寂誰為伴水底初聞兩部蛙

同單令遊延明寺

下馬敲門扁蝠飛，亂鴉啼晚客還歸。
村江淺可褰裳涉，美酒清宜滿掌揮。
獨樹高花紅啄玉，繁叢嫩藥細編璣。
追隨冠者皆行樂，借問何人鼓瑟希。

和單令簡園梨花四絕

梅花如夢李成塵，却伴酴醾過晚春。
未要烘晴千樹白，且看帶雨一枝新。

野老山園未省開，今朝何事客俱來。
炎荒有此清涼地，

剪水裝林絕點埃

共傳嘉樹鎖山陰
水彩瑤光自一林
未必甘滋追大谷
照人風韻故能深

清遊當日興怡融
無奈如絲雨映空
聞道只今方爛漫
莫教飛趁棟花風

和單令九日二絕

爽氣深秋徹九霄
憑高眼界迴寥寥
淒風但可開黃菊
零露行應到蓼蕭

行樂從來貴及辰
况逢節物一番新
病夫久矣捐杯酌
悵望臨風落帽人

題清遠峽山寺

丙子

清遠峽山寺幾年聞
汝名維舟得眺望
滿目慰經行
壁立巉天秀
溪間寫鏡清
嶺雲方北上
濤雪漫南傾
罪垢三熏淨
歸風兩腋輕
皇慈天共大
睿知日同明
重起闕廷戀
敢懷山水情
生綃無畫手
聊此寄真形

歸次義彬老人廖康吉惠靈壽杖以二十八字謝

之

綠鬢投荒白髮歸瘴餘渾欲不勝衣煩將扶老殷勤贈
未怕登高足力微

魏漕彥成昔宰弋陽政績上聞召對改秩予適當
詞命後自臺郎出守滁墾荒田千二百頃柄國
者挾妻家私憾以為罔功將漕襄陽修築大堤
禦水患又以為妄作與洪興祖為程伯禹刊論
語解至周公謂魯公有太息流涕之言彥成遂

被竄于欽州柄國者死例逢赦宥歸道南嶽以
大篇侑酒十尊見遺因成七絕以謝之

紹興乙卯選賢時弋水鳴琴有去思文石對馭言動聽
演綸無愧改官詞

滁萊千頃變嘉禾兩歲之中績效多賞格雖懸初不用
柄臣何事有偏頗

漢水縈州北且南大堤花映府潭潭若非刺史裨顏缺
鵬綠澆成幾醉酣

解到周公謂魯公尚書深見古人風流傳頓廣誰之力
千古須知魏與洪

天涯羈枕看三山一日皇恩詔使還君子但知為善樂
豈同餘臭滿人間

名酒煩將一斛來瘴餘衰病不勝杯醉中獨愛春容奏
恰似春潮卷海迴

聞說仙居竊復寬湖山全似畫圖看謫歸正值皇綱整
莫向斯時詠考槃

簡彥達

別來魚雁半浮湛一日掀杯酒便深照水顏容皆欲老
陰門槐竹盡成陰驅山塞海成何事飯糗羹藜只此心
但願歲豐人共樂扶節有興即相尋

將歸南嶽黎才翁命蕭復來相迎且以二詩見貺
因作一絕謝之

涑水分攜首重回南山指日可徘徊殷勤問訊煩甥友
更遣新詩兩詠來

斐然集卷五

欽定四庫全書

斐然集卷六

宋 胡寅 撰

除中書舍人謝表

記言文陛已非傳信之才承乏詞垣遽有即真之命省
循負愧隕越拜嘉中謝竊以典掌贊書為儒林之妙選

與聞幾務乃法從之要津基帝命于省中闡人文于天
下自非學深往訓識達今宜判花協僉論之公視草擅

語言之妙端方有守忠信不欺則何以潤色遠猷參聯
近列伏念臣降才魯鈍聞道淹遲挾策少年漫習雕鐫
之小技趨庭壯日方聞經濟之大端指夷路以騰驤顧
急流而斂退頃因入侍嘗請賜休入則事父兄初識仲
尼之為政言必稱堯舜更聞孟子之欽王懼素業之未
成悵流光之坐易荐蒙嚴召俾即舊班重入修門覲當
前席豈謂美芹之獻而堪華袞之褒策牘家傳敢自期
于麟角絲綸世掌曾何有于鳳毛惟是教忠于焉資事

恭承明制不獲固辭此蓋伏遇皇帝陛下耆定武功誕敷文德謨訓之懿上配于三王昭回之章下飾于萬物宜有能言之士出膺給札之榮顧慚微臣塵玷盛選况父子並躋于禁路在縉紳咸以為美談伏惟恩私何以報塞補天煉石雖無五色之文委質策名夙有二心之戒以茲自勉儻稱所蒙

除集英殿修撰知邵州謝表

方司帝制忽剖郡符戴從欲之慈仁積違顏之深戀

中

謝

伏念臣資才既陋術業仍疎未能善已而疾惡太深
無以逾人而叨榮已甚物情夸已世俗尚諛凡司毀譽
之人皆惡丁寧之語至于同省正爾自疑出則誦言謂
陛下惡臣之訐直入而浸潤指大臣用舊之黨偏謀欲
譖人如得奇貨陛下知由來而罔惑察交鬪以甚明欲
一網而盡者計未得施思直道而行者人姑自保臣于
此日幸免嚴科許以便親坦然去國比出修門之外上
還次對之除曲賜矜憐特形慰諭雖慈父之于子不過

如斯惟大恩之所蒙若為而報此蓋伏遇皇帝陛下體
天覆幬並日照臨稽衆如堯知巧言之可畏取人如舜
聖讒說之震師施及下臣獲全小節臣敢不增培學殖
勉勵操修有社與民事主何分于内外移忠以孝致身
終誓于糜捐

除徽猷閣待制謝表

詞闡請去初之年勞綸命疏榮遽遷職序仰銜殊眷俯
激懦衷中謝伏念臣聞道不先效官太早行致身之義

雖力慕于前修迷涉世之方常恐貽于後患昨預招延之列浸登機要之司翰墨非工言尤已積褒嘉猥被朝嫉遂多終賴保全俾逃躋藉招此忍同于激楚夢魂空遶于勾陳覬奉真祠少安蹇步向使有功于演語猶當累日而拜官况無東里之稱濫次西清之對一蒙枚拭那復瑕疵徒愧恩施未知報所此蓋伏遇皇帝陛下用人惟己以道觀能將博取于衆謀欲恢張于丕業絕壑萬牛之重咸備棟梁疲駕十駕之凡亦歸鞭策遂令遠

迹重蓬近班臣敢不學務知新行思寡過循良豈弟期
無負于承宣獻納論思豈有分于中外庶收塵霧以答
丘山

嚴州到任謝表

上還濱水之章不蒙賜可改畀桐江之紱更荷親除已
見吏民具宣德意拜嘉甚寵受任奚勝

中謝

伏念臣早

以諸生濫塵黃甲初典芹宮之教繼參蓬館之遊難省
握蘭螭坳載筆遂躋法從專掌贊書曾未習于治民乃

自期于補外已勵飲冰之操偶牽嘗藥之情因請奉祠
反叨易地內量才力無以逾人仰迫恩私不遑將父臣
今所領地望尤高氣象鬱蔥上聖兆興王之迹溪山瀟
洒前賢遺高世之蹤近止朝廷隱然藩輔豈伊緜薄所
克堪承此蓋伏遇皇帝陛下擇人任官愛民猶子謂臣
嘗侍軒陛必知惻怛之懷察臣久在里閭或諳疾苦之
狀付之牧養責以循良惟是此邦本亦無事政煩賦重
弄兵或至于陸梁薄斂緩刑按堵自臻于靜治臣敢不

服勤夙夜少効涓埃期免後艱以副保全之意更申前
請冀從孝養之心

駕幸建康問起居表

日行天運四方均被于照臨雷厲風飛萬物悉歸于鼓

動

中賀

恭惟皇帝陛下孝存九廟心切兩宮誓將伐獫

狁而出車豈特鋪淮瀆而執醜沉潛剛克肇敏戎公上

契帝心下符人欲當六飛之初駕宜萬福之是膺臣限

以守符阻于扈蹕

闕

永州到任謝表

瀝懇干威蒙恩賜可稍諧色養亟服官箴

中謝

伏念臣

學謝通方材非適用與時寡偶同朝嘗困于斷斷造事
多窮一介自知其斷斷幸值聖明之主嘗叨剴切之褒
遂欲請纓仰酬知遇豈甘懷綬退即便安屬父年已迫
于摧頽在子職尤先于定省良藥地偏而莫致珍羞市
遠而缺供陟岵遐瞻共結雲飛之恨循咳相戒深懷日
短之憂屢瀆天聽果從人欲俾解桐江之印復分瀟水

之符因感縮于鯉庭更婆娑于萊戲朝敦孝治誠錫類
以非難民偃德風乃興仁而競勸顧臣何者荷眷如斯
此蓋伏遇皇帝陛下性蘊堯天德昭舜日至心不匱推
內恕以及人博施無方遣近臣而分土臣敢不益殫風
夜祇服訓詞三釜及親榮已逾于曾閔六條宣化效當
勉于龔黃仰瞻華闕之餘彌積丹心之戀恩雖難報忠
必可移

代家君除寶文閣直學士賜銀絹謝表

臣某言昨奉聖旨以臣解釋春秋書成特除寶文閣直學士仍賜銀絹三百疋兩臣尋具辭免准詔書不允不得再有陳請者臣已扶疾望闕謝恩祇受訖未學荒疎上瀆高明之聽異恩濃厚俯加勅瘁之身拜賜有光撫躬增媿

中謝

伏念臣志雖汲古才不逾人方太平極盛之時久甘貧賤逮神武中興之運已迫阨殘獨抱遺經自從所好潛思雖篤涉造弗深窺美富于宮牆詎臻彷彿揀粹精于沙礫忍弃錙銖閱歲律以屢更顧聰明而

凋喪因加紀述聊備遺忘私淑諸人罔繼昔賢之軌道
興乎世幸承溫詔之言促就簡編仰塵几御涓埃自竭
海嶽何裨頒陸賈之金獨緣新語賜春卿之爵止為舊
恩豈如微臣兼受大賜褒嘉甚腆稱塞知難此蓋伏遇
皇帝陛下天授英資日躋聖德守經合變稽筆削以有
為舍己從人采菲封而不棄肆推德賞加賁陋儒臣敢
不仰體眷懷恭承嘉惠竒蹤自遠尚陪清切之班大藥
有資庶獲康寧之福傾葵莫喻結草為期

代先公遺表

有生必死乃物理之大常無德不酬實人臣之至分將

違聖代更納善言

中謝

伏念臣奮迹寒鄉策名熙世且

降才甚鄙造事多窮功書茂著于涓塵仕路漫諳于升

黜晚叨殊眷復列近班隆旨閔勞俾就祠庭之逸羸軀

嬰疹更慚廩粟之頒念獨抱于遺經矧特蒙于優詔畢

精竭慮庶克祗承廢寢忘飢遂臻危殆日西頽而已迫

川東逝而弗還生也有涯夫奚可益斃而得正則亦何

求伏望皇帝陛下保合太和建用皇極撥亂反正深明
尼父之心任賢使能早繼周宣之治再安神器永御寶
圖臣已隔清光空餘忠戀裹屍效死雖莫逮于昔人結
草報恩誓不渝于素志

賜先公銀絹謝表

昨于紹興八年九月臣本家准尚書省劄子三省同奉
聖旨以臣父所進春秋義著一王之法方欲召用遽聞
淪亡可特賜銀絹三百疋兩令湖南轉運司應副葬事

仍賜田十頃以恤其孤餘人不得援例除賜田臣先具
辭免外餘已祇受皇恩者遺忠作聖具存謹始之書宸
念閔賢特厚飾終之典恩併沾于孤息義深勸于百寮

中謝

伏念先臣早潛大業願學孔子故服膺于春秋譬
之宮牆蓋見美于宗廟壯年發憤皓首成書親逢睿智
之日躋况許遠猷之辰告奏篇迄上方裨乙夜之觀召
節垂頒遽作重泉之隔注懷未慙錫命有加將厚意于
幣金給稱財于壤隧至謂著一王之法方袞贈以誠諭

更令絕援例之人示變章而已足恭味崇儒之旨深惟
遺老之思在昔鮮倫方來是式豈茲存歿竊以哀榮此
蓋伏遇皇帝陛下祖述帝謨憲章王道敘典秩禮以承
夫天意命德討罪以馭夫人羣慨然撥極亂之絲棼卓
爾被中興之眷佑麟經不絕鳳德那衰臣頃在居廬弗
遑奏牘書藏石室嘆古人待後之傳疏列銀臺述此日
蒙休之異莫勝殞咽曷副矜憐

辭免賜田蒙降詔允謝表

昨蒙聖恩閔先臣淪亡賜田十頃以恤其孤臣不敢上
當異數即具辭免伏奉詔書獎諭依所乞者賞延于世
欲令永謝于窮愁父教之忠將使不墮于清白懇誠上
達聰聽俯從鄙家容日月之光坎水適井蛙之願

中謝

竊以許行去楚本乏一廛季子墮秦因無二頃急于衣
服之奉是或物情之常雖斥廣田疇固非高士而服勤
隴畝亦有先賢恩私既軫于談經寵答遂光于畫壤族
多困弊人覬溫饒惟揣分以當安故拜嘉而莫敢誠仰

宅心之訓必敦處約之仁不慕執鞭自窺絕筆視握苗
而興嘆觀學稼以知非既浮雲莫翳于靈臺乃汗簡克
當于賞鑒顧茲愚嗣皆曰凡人出預論思早竊累鍾之
奉處修孝弟尚均斗粟之春比先臣自奮于艱勤愧諸
子已甘于恭養君羹不洎負米長悲理合屬厭幸蒙賜
可此蓋伏遇皇帝陛下俟賢加腆勵俗戒貪錫以膏腴
始推仁而博施嘉其廉遜終徇志以曲從諷誦堯言激
昂參魯臣謹當益堅素守祇率義方修禮以耕庶不茅

于心地移忠而事期無忝于德音

辭徽猷閣直學士知永州恩命蒙降詔不允謝表

祇奉新書已愧聖知之厚荐蒙溫詔益知官寵之優志

雖守于匹夫義難形于再瀆撫躬兢惕拜命徊徨

中謝

竊以列聖圖書所藏非俊乂之臣孰堪寓直遠方民社
所寄惟循良之吏乃克承流稱一職以為難兼二能而
豈易伏念臣學蕪而識陋智短而才疎感慨逢時風抱
捐軀之志思皇得士嘗蒙前席之咨論功茂繼于時髦

撫迹空縻于歲紀遂罹釁罰良自叨逾洎三釜以長悲
首一丘而待仆既邈劬勞之報便顏榮進之心而况舊
苦臂拘新纏心悸砭湯未效付餘燼于寒灰雨露重沾
出寸萌于顛木不令避免更欲激昂衆耀蒙休懼深履
薄此蓋伏遇皇帝陛下臨朝願治以道觀能念方州之太
輕故分庸近侍考毀譽之已試乃因任舊人曾是獎提
及茲孤痺臣謹當溫尋廢忘勉策疲庸倘幸到官誓竭
涓埃之効庶幾寡過以酬天地之恩

永州到任謝表

誕敷德意播告疲民雖江山千里之遙如觀闕九重之
近非惟良而共理斯受寵以若驚中謝伏念臣道學弗

深更能更淺致身事主嘗聞大訓于趨庭中孝顯親徒
負深悲于過隙餘生雖在諸念頗頽敢謂恩私再加褒
用仕宦至二千石載籍稱榮前後纔六七年除書屢降
矧是永州之古郡實惟平楚之中流蜀相受知社稷早
推于重器唐人謫宦星芒獨耀于高文雖窮陬乏金谷

之饒顧雅俗有絃歌之盛輒蒙委寄何以堪承此蓋伏
遇皇帝陛下保固邦基簡求師帥不泄邇而忘遠同周
武之用心欲訟理而政平邁漢宣之圖任俯憐羈縻曾
侍睟嚴庶能宣惻怛于遐方固可責循良于薄技而臣
比緣久役增重宿痾巨擘無強豈有人功之指畫靈臺
易震未還神觀之精明少効微勞再干洪造黃庭紫府
奉香火以周旋赤箭青芝燮筋骸而康濟遂起將深之
疾進輸無隱之忠

乞宮祠降詔不允謝表

削牘輸誠願投散局出綸示寵尚閔俞音拜命有光撫

躬增懼

中謝

伏念臣材資甚鄙智略尤疎自蒙特達之

知未立殊常之報銅魚繼佩獲邇松阡竹馬再迎乃慚

棠茇惟竭愚衷于辰夜勉宣德意于疲羸倘副委令庶

無罪悔而乃閔方肘後覺身慮之亡聊趣辨目前悵聰

明之不及永念專城而竊食敢云閉閣以偷安踏地靡

遑籲天有請此蓋伏遇皇帝陛下建賢以圖外治累日

而責成功視民如傷每錫循良之懋賞使臣以禮常全
進退之大恩曲軫皇慈過形溫諭顧恭然之質被華袞
以難勝而最爾之邦耀宸奎而增重臣雖貪藥石尚冀
涓埃終祈從欲之仁以逭瘵官之譴

除提舉江州太平觀謝表

不任郡事久稽曠職之誅請上印章再被閔勞之寵洪

私所浸弱植奚勝

中謝

伏念臣術業空疎智能謏薄自

沐藩宣之寄竄惟窮牧之求不善催科軍興屢乏所期

靜治民瘼小蠲顧祿賜之已豐緣福基之素薄陰陽交
寇憂慮積傷臂運指以不能疥遂疔而增劇綠鬢遽裝
于白雪清臚復翳于昏花對鑑無塵漫有功名之意觀
雲不駐敢萌富貴之心瀝此危衷瀆于公聽豈意仍叨
于清貫且令自逸于殊廷此蓋伏遇皇帝陛下並日照
臨侔天覆幬支持厦屋兼收根柢之材駕御英雄不竭
駑駘之力遂令孤蹤尤軫深仁臣敢不愛惜分陰訪求
大藥雖辰猷仰告自隔于江湖而夜氣默存均沾于雨

露恩光未答縻隕為期

冊立皇后賀表

乾坤合德日月並明凡居履載之間均被照臨之賜

中

賀

竊以塗山啟夏媯汭興虞若稽聖帝明王罔不齊家

治國恭惟皇帝陛下孝思九廟色養東朝眷中壺之久
虛考外廷之僉議樂茲淑德非以愛登煒燁椒塗之尊
柔嘉葛施之化一人有慶四海是孚臣竊祿觀祠馳誠
魏闕獻百男之祝三復思齊想萬壽之觴載歌既醉

致仕謝表

剡牘陳情願乞骨骸之賜出綸許謝得安林壑之居拜

命有光捫心增愧

中謝

伏念臣器同瓠落材更液穉少

也習文而匪工壯焉委質而甚慙讀書涉獵但傳糟粕
于前人論事荒唐寧補絲毫于當世入班二省清嚴之
地出畀三州尊重之權侍經帷則未能陪日月之明服
詞禁則無以鼓風霆之動典禮視秩宗而自愧牧民方
循吏以誰如歲月侵尋江湖渺緬駭機屢發獨賴矜寬

腆祿坐縻詎忘捐殞曾是福基之狹居然氣幹之衰既
困負薪遑干繼粟雖則訪求于大藥未甘慘慄于小山
而乃自覺支離日臻癰瘁目花眩蠅翼之翳耳沸喧蜩
聲之啾跪起痠酸秉持緩弱班資故在殊非厄閔之楊
齒髮遽彫宛是望秋之柳諒難勝于執掌因決計于棲
遲此蓋伏遇皇帝陛下義不遺遐仁惟念舊知士俗喜
榮而憎謝將激勵其廉隅謂人臣辭位而告歸必保全
其志節肆頒俞旨仍進文階聽達遠于官途俾優游于

聖日訓言甚寵名論莫踰鸚下蓬蒿顧逍遙而已足鳬
飛渤澥計多少以何虧洪造無窮微軀獲考雖在陳力
不能之際寔懷感恩未報之忠臣謹當勉所可修輔其
將弊期復神明于舊觀克存道德于初心慕伯玉之知
非年從屢化師仲尼之發憤老亦何憂用此荅酬庶逃
罪悔

進先公文集表

臣某言臣弟太常丞寧輪對奏事伏蒙聖慈宣問乃父

既解釋春秋尚當有他論著其具以進者宸衷尚舊故
老形思訓釋典文夙簡淵深之記遺餘篇翰更蒙清燕
之求

中謝

伏念先臣早捐塵事志希任道謀不為身心

遠地偏寄陶廬于三徑人憂己樂甘顏巷于一瓢吟詠
性情而無雕蟲篆刻之為交際往來而乏竿牘苞苴之
智中經倣擾多所散亡晚獲奠居僅成編秩精忠皎皎
每提撥亂之綱莊語諄諄多闡濟時之用進則傾懷于
君父退猶關說于公卿壯懷投老而益堅弱齒抱病而

彌勵自期有補終冀一伸丘木成陰雖鬱春秋之志囊
書奏御何殊旦暮之逢此蓋伏遇皇帝陛下典學裕身
崇儒化俗華袞豈惟于一字緇衣不間于十年乃因仲
息之對揚錫以溫言之清問斯文不墜多士流傳臣謹
已校定舛訛分成門次爰從傳置進備覽觀函劍有光
既徹斗牛之象浦珠無類合供旒冕之須

落職謝表

伏奉誥命臣僚論列臣坐昨與李光通書落職職列禁

廷身居里巷安榮難冒鎬奪是宜伏讀訓詞恍驚方寸

中謝

伏念臣頃分符竹合畏簡書乃與罪人輒敦風義
一講寒溫之問寧存誹謗之心相聞既類于交私自保
愈慚于明哲九年宿負閱寔如新三褫嚴威撫躬若厲
此蓋伏遇皇帝陛下操持八柄駕馭羣工用刑弗間于
隱微示戒俾知于恭慎江湖雖遠震耀惟均臣敢不言
動加思公忠是力庶逃大悔以答隆恩

散官安置謝表

准尚書省劄子備坐臣寮章疏言臣罪惡奉聖旨責授
果州團練副使新州安置臣即日奔馳上道水陸兼程
已到新州公叅訖重劾批根期于勿植皇慈軫舊貫以
有生姑置遐荒俾知內省危衷震動感涕流漣

中謝

伏

念臣初乏令猷誤塵清貫歲時淹遠咎戾浸彰乃致抨
彈謂虧忠孝罪多擢髮疵非吹毛思父慕君五情隕穫
控舟踰嶺六氣并毗朝典至公臺評勿僭皆臣自取反
己誰尤此蓋伏遇皇帝陛下與物為春退人以禮德同

舜大千舞兩階仁類湯寬網開三面俯矜墜石曾侍甘
泉特出隆恩弗加大譴臣敢不恪終嗣道刻勵臣規仰
止先民行乎患難夙宵觀過惟務修身萬一棄瑕尚圖
報所

再表上二表既行累月邸院駁下新州不依條差
官點對繳奏亦以落職初不見事因後得大理
寺符方知坐李孟堅供嘗與其父書因經界誹
謗不敢自白再上此表邸院又打下云左降官

不應上表

批根重劾論以四凶祝網隆私開其三面驚餘魄悸感
極涕沱

中謝

伏念臣初乏令猷濫聯清貫年時浸遠罪

咎滋彰惕若微軀虧乎大戒正推子道莫重承宗雖遠
仕途敢忘祇辟矧復華資難冒淺局易盈遂速顛隳致
干呵譴控舟踰嶺行觸蘊蟲裹藥負候居防瘴蠱皆由
自作夫豈人尤尚玷散員仰繫善貸此蓋伏遇皇帝陛
下德侔天大明並日中立愛惟親於昭孝治使臣以禮

用勸忠規俯念遺簪嘗持舊橐俾知循省姑示竄投臣
敢不慎厥身修行乎患難雷霆震耀既肅豐刑雨露涵
濡猶祈解澤

自便謝表

恩由獨斷澤被諸纍強臣之壅閼雖堅聖主之聰明無
蔽乃公朝之盛事非小己之私榮祇叙孤忠仰塵淵聽

中謝

伏念臣降才不腆涉道甚膚妄有意于壯行蔑自
知其躁進螭坳載筆當龍飛天位之三年鳳掖演綸實

虎變人文之九載荐更外使還蓬中臺陪講幄以談經
參玉堂而視草慙愚冒犯嘗違斧誅剋切論思更叨褒
贈銜憂去位從吉為州遭逢論道之人憑恃貪天之力
黨同伐異瘠國肥家淪三綱而外交託一德而上浼臣
受恩再世雅意本朝事主有悽悽之誠輸忠無坦坦之
路輒慕隱居而求志庶幾遠害以全身遂掛衣冠退尋
丘壑少待冰山之泮還瞻雪睨之光尚且猜虞必加中
害臺評受其風旨誣以不忠不孝之名詞命出其妻家

當以腹誹反唇之罪欲辨明而奚敢具章謝而莫通一
墮黃茅六看春草病無醫藥窮逮饑寒忍攫抓于衆狙
聽欺凌于百鬼戴盆伏地難窺覆幬之高明傾藿向陽
終預曦輝之臨照獲脫賸拘之俗復陶貴肆之風仰荷
矜憐若為報塞此蓋伏遇皇帝陛下收還八柄陟降羣
工臣作福威既自罹于殃咎天為剛德初奮發于沉潛
巍乎堂陛之尊崇惕若風雷之鼓動遂使赦無留令昔
阻隔而今行士有非辜姑放投而終宥在顏威邇銘腑

感深跼鳶已出乎煙嵐豈忘飛戾瘦馬倘加之秣飾尚可驅馳

復官職謝表

盡滌垢汙恩波浩蕩俾還官職綸誥坦明感切涕沱喜
深拜舞

中謝

伏念臣智謀不足以識時務文彩不足以

為國華唯資家學之教忠仰慕先賢之致主被遇况早
眷知非輕雖拱侍北辰歷光陰者兩紀而放投南裔蒙
葦菲者六年葵心密向于重光蓬首莫知其萬死白髮

飄蕭而老去黑裘破敝以歸來苟非睿慈垂察孤蹟遺
簪墜履不忍弃捐片善寸長尚期采用則何以首膺赦
宥荐對寵休此蓋伏遇皇帝陛下廣運聰明弛張文武
博學造皇王之極摯沉機收制斷之大權旋乾轉坤而
關機閣開雷厲風飛而日月清照泰通君子之志決決
小人之柔有如微臣亦預大賜臣謹當激昂衰懦游泳
至仁顧摧傷疾病之餘只合嗣農歌于堯壤念獻納論
思之舊豈能忘雅意于漢朝自結主知更從今始

代劉待制遺表

生也有涯孰移定命死而不朽難跂前修獨餘垂盡之

忠仰籲蓋高之聽

中謝

伏念臣早憑世賞浸歷仕途作

屬外臺入丞卿寺偶鎮府上扞城之伐于機司叨秘閣

之嚴繼忝使華俄丁家難值神武中興于丕祚而師干

初試于邊庭世屬艱虞家傳忠義妄意功名之際會不

虞材智之卑凡祇赴詔音亟聞除用坐談將幕曾無虎

豹之韜攝事帥藩那有鸛鵲之陣盡瘁謬殫于筋力論

功茂著于絲毫投匭是宜甄收未替出駕輅車而撫士
歸分符竹以臨民尋從祠館之便安擢付江壩之要重
疏榮渙汗還綴甘泉而臣識昧遠猷器慚大受與時寡
偶造事多窮推擠並嘖于煩言保庇盡歸于全度念國
恩之未報豈家食之遑寧尚冀鵠銓再堪策礪詎知蒲
柳頓迫風霜顧靈劑以何施悲逝川而莫返將捐朽質
勉貢善言伏望皇帝陛下並日照臨侔天覆幬持守盛
成之治柔能遠邇之情燮太和于穆清措羣品于熙晏

任賢勿貳永隆不拔之基與時為春坐享無疆之歷臣
委身厚夜絕望穹宸拖司寇之紳不能下拜寢大夫之
簪獲以正終

代向直閣復職除湖北憲謝表

戴盆絕望仰洪覆之何私傾藿當陽祈容光之必照丹
書已削紫誥仍頒直中秘之圖書付外臺之耳目恭承
擢敘彌劇震惶中謝伏念臣稟資至愚趨勢甚拙屢忝
分憂之任惟思共理之忠驅虎豹而遠之善良是保受

牛牢而牧者蕃息為期惟彼合江最稱凋郡遺種幸逃
于鋒鏑調庸復困于金湯仍遭雲漢之憂更急羽書之
餉猾吏承心而蠱尾疲氓耐轍而燕巢曾是羈單誤蒙
器使稍鋤巨蠹漸振頽綱施行恪奉于詔條檢率先嚴
于寮窠呻吟少定流散粗安庶有袴襦免自書于下考
忍脩廚傳以善事于上官豈期饕餮之徒敢負澄清之
寄巧為章奏公肆詆欺內省不愆甘受四年之譴庶言
既繹初無一事之真實荷聖明洞知沉枉併加滌拂俾

効捐塵具臣慶公道之開下士免脅權之困此蓋伏遇
皇帝陛下恢張治具獎勵才猷遠惡直醜正之人重守
法奉公之吏慎選不遺于一介哀矜尤在于五刑臣敢
不欽奉訓詞益修履業向以責人者今以責己用不負
于隆恩抑聞守道者是為守官更勉圖于來效

代范漕移湖北漕謝表

使指終更蔑聞于底績宸綸易地仍畀于輸將仰惟因
任之恩積有冒榮之愧中謝伏念臣箕裘替緒薪樵荒

材少日趨庭粗獲聞詩而學禮長年從宦惟知守道而
向方當大搜髦彥以綏寧四方之時乃累被咨詢參刺
舉一路之寄憲章具在何所建明金穀羨餘靡勤調度
況乏汝南之清裁寧逃月旦之公評所懼黜幽更叨器
使此蓋伏遇皇帝陛下道參天大治格氣和思足國而
裕民用寧邦本肆因能而授職博盡衆才致茲已試之
罔功猶辱上流之重地臣敢不勉殫夙夜恪守靖共鞭
黠錢流倘稱木牛之運根盤節錯敢辭鼯鼠之窮

斐然集卷六

欽定四庫全書

斐然集卷七

宋 胡寅 撰

謝貢啟

丙申

論秀鄉邦深慚庸陋獻書天府猥預甄收初聞姓名之
傳頗覺心顏之覩竊以聖王有作世道交興辟雍首善
于京師學校明倫于郡國氣蒸川泳雷動雲飛惟楚國
之上游有荆門之要壘沼藏珠而媚景州產玉而得名

峽水西奔詞源可想郢樓東峙曲韻爭高衿佩之侶摩
肩絃誦之聲盈耳遇良輒取寧空冀北之羣待賈而沽
多抱荆山之璞欲當妙選宜屬美材如某者樸遯無庸
踐修尤淺家庭入侍早聞詩禮之方黌舍出遊幸被師
儒之教究難窮之事業驚易往之歲時黃卷青編坐消
寒日朱顏綠鬢獨對春風未居比數之流敢有賓興之
覲夫何末技亦綴後塵事雖儻來恩實有自某官士徒
儀表吾道宗師澄學海之深澗植儒林之美蔭文高萬

丈燦然星斗之光名壓衆流響若風雷之轉惟茲後進
亦仰前修遂使愚頑猥蒙題品某敢不勉其未至增所
不能觀絳闕之光幸齒羣英而入獻貢丹墀之策期收
薄效于決科儻素志之未違庶明恩之可報過此以往
未知所裁

問候張相啟

庚戌

一違台屏再閱時行良史直書茂著丹青之效慙言妄
發合干斧鉞之誅旋屬家君累辭朝命寬仁賜可已知

負疾而無堪喜懼兼懷其敢冒榮而不去罄披誠悃繼
荷俞音俾寓直于河圖仍即安于琳館拜辭文石之陞
歸覲綵衣之庭孤突教忠庶無罪悔蕭生雅意終誓糜
捐由二浙而問津及臨川而聞戒越趙章貢冀達瀟湘
身遊塊土之鈞孰云置散夢遠熒煌之座能不侍前遂
忘重趼之勞思奉片言之誨發其蒙覆借以輝光戀德
既深向風增抃寒威漸弛暖律初回願益定于鼎饗用
早躋于槐席

荅湖北趙憲啟

丙辰

頃誤簡知進司三事旋懷汨養請布六條維是涓川介
乎湘楚民淳事簡本遊宦之樂郊行悔言尤亦省愆之
靜處適庭幃之久病方藥石之未間捧檄固榮望雲更
切罄輸危惓仰籲高聰乞從祠館之安覲免郡章之付
虔須允旨尚闕馳書某官疏派洪源騰芳夷路卒浮丘
之業經學有聞讀元王之詩風騷甚富爰念剖符之地
密隣仗節之方敦篤襟期寵貽戡翰粲然丹腹施樗櫟

以非宜詠彼木瓜報瓊瑤而何有披風尚邈跂德尤勤
願益保于生經以茂承于光寵

賀湖南王漕啟

解虎符之佩光被詔書仗龍節之權肅將使指先聲所
暨喜氣惟均某官美德粹夷高風凌厲書開萬卷列科
居游夏之倫筆掃千軍揆藻出班揚之右談兵將幕佐
計漕臺久練達于政經尚鬱堙于賢業留京子佩嘗賴
表儀遐徼烏蠻更煩綏御本自金閨之彥合陪玉笋之

班將勤三節之走趨先試一方之刺舉眷茲湘俗困彼
軍須但椎髓而弗矜既露根而可畏狡桀有隄符之念
柔良多狴犴之冤微官惟急于受知大吏苟祈于免過
頽波如此遠慮奈何竊詳聖主之保邦允藉仁人之種
德士欣除目民止遯心某自間風猷相望楚越置酒高
會形夢寐于十年賦詩遠貽寫殷勤于千里豈謂剖符
之地密依攬轡之封先取豺狼式觀政術再歌襦袴當
仰吏師惟幸會之方深匪敷言之能罄輕寒在候遠涉

正勞尚慎節宣以承光寵

荅沅州王守東卿啟

伊川洛汭十年同緩轡之遊沅水濱江千里接分符之
壤瞻言契濶敢敘惓惓自昔解攜尋遭蕩析共楚天之
月徒有詠思棲衡嶽之雲固嘗招隱學未周于已事心
敢累于世紛偶被召除進司書命吾徒忝竊深慚子厚
之旁觀公等弃閒當誚臧文之竊位竟緣冒昧恐速推
擠有懷奉檄之榮自詭專城之寄問安嘗樂情既戀于板

興刺奏叫閭願獲從于琳館雖幸託兩邦之契而未遑
馳一介之書某官義比金蘭契同膠漆屢枉孟公之尺
牘如披彥輔之青天梅樹月明撼雪英而命酒竹亭春
暗陰雲葉以嘗茶薛華最善于醉歌李白尤高于長句
三川邈矣一夢恍然文老益工疑得江山之助才高未
展合依日月之光臨邊鎖以徒勞奉詔函而非晚重欽
垂眷邈枉飛文讀厚報之詩願敦夙契修寶隣之好莫
遂初心尚阻披承益深瞻頌冀妙願于寢食以蚤對于

寵光

謝浙西帥啟

祈從散局不奉俞音改畀近藩復叨優命顧此臨民之
始適當開府之初幸會所深寅緣有自某官器資英邁
才智通宏北道觀風嘗著扞城之畧南州攬轡尤高富
國之功久爾踐揚藹然譽處果膺宸眷擢總行畿發硯
之刀常新坐空盤錯枹鼓之聲不聳行被寵褒某濩落
無堪液橐奚用久荷出塵之照茲諧陰德之方

謝浙漕啟

祇承綸命改畀郡符顧非師帥之良幸託澄清之庇自
惟多躋庶獲少安某官才資絕人儒雅飾吏盤根錯節
解牛之刃常新輓粟飛芻流馬之功益著國計有賴上
心所知別觀詔除以快輿議某崎嶇可笑濩落無堪荷
知素深睽德浸久雖趨風之未果欣託蔭之匪遙庸以
腹心布之竿牘方茲淒凜願慎節宣

迎呂相啟

伏審被追鋒之召入覲宸顏付居守之權典司宮鑰制書一出輿誦四騰某官茂德格天精忠貫日才肩房令居多應變之功智比姚崇允號濟時之相險阻備嘗而不改其操富貴已極而克勤于邦起自真廷遐分帥閭當雲漢嗟吁之後適羽書調發之時威肅崔符惠先溝壑仁風所播坐獲豐年民瘼既除遂成樂土甘棠之化南國寔維羣辟之師繡袞之來東山無復大夫之刺聖君虛左以待元輔非公而誰措國步于大安享天心于

一德某久違台座竊守郡章屬橐鞬以修恭徯瞻旄鉞
託帡幪而庇迹正荷陶鈞

答王鹽啟

竊審拜恩北闕仗節南州問俗觀風山川改觀奉公守
法民物知歸某官白壁持身青松植操文學足以飾吏
事器識足以應時須三尺是循坐折姦凶之氣百鍊不
變衆欽剛特之才固當凌厲雲霄羽儀臺省發硃游刃
並攄露于蘊藏煮海摘山豈勞煩于計畫未遑馳慶先

枉飛文欣悚之私數宣罔既

答秦德儒啟

竊審拜命宸庭通名京籍亨衢伊始清論所期某官純
茂賦資端良修志早培學殖發為春麗之華不襲世芬
挺立歲寒之操沉下僚而自適藹榮問以甚休當塗不
壅于上聞逸軌漸看于橫鶩某頃分憂顧初接風猷欣
楚國之有材欲周家之多士比君鵬鶚慚非薦禰之流
贈我瓊琚愧辱報齊之意誓言什襲寧述四知

答路樞賀年啟

代家君

斗柄回寅陽聲入律若木餞餘寒之氣時朝崇嗣歲之儀慶禮既陳頌言斯舉某官夙推公望靜葆天倪五福純全雖脫紅塵之屣四方傾屬宜歸紫極之班肇對嘉辰必符善祝某負痾寢劇修謁無緣徒切傾祈莫勝敷述

賀年啟

寶曆更端陽春交泰槐烟泛彩迎天上之和風栢葉浮

林絢人間之慶禮某官忠存廊廟名動華夷接武赤松
世服遺榮之勇歌詩棗竹皇深舊弼之思宜對令辰早
膺急詔某初還親右阻造客間頌祝徒深敷陳罔既

又

新元肇序上日開祥柳色槐烟迓陽春之交泰椒花栢
葉修獻歲之盛儀某官緯世傑才端朝公望幅巾坐嘯
無煩虎豹之韜急詔言歸行慶雲龍之會式臨穀旦倍
擁繁禧某職在親闈望遙賓閣奉一觴之爵徒劇傾祈

修咫尺之書莫伸悃悃

又

寶歷更端陽春式序寅饒餘寒之氣交脩嗣歲之儀某
官學探本原文追典雅宣平反之詔功既及于一方展
經濟之才恩佇承于三接未遑馳慶先辱惠音感頌之
深敷宣罔既

答唐道州啟

比者解印桐江分符瀟水初獲便親之欲仰荷天慈載

欣接壤之仁遠同河潤屬乍休于徒馭仍謹視于簿書
尺牘未修飛文先及退惟涼薄何以堪承某官才稟疏
通政成肅給仰分憂寄依然循吏之風遠紹家聲尚矣
名卿之胄行聞顯用益奮遠猷某器業非長官箴未熟
有可師之隣國庶免曠瘳無越境之會期徒深渴仰和
風扇物淑景宜人尚慎節宣慰茲勤禱

答鎮江劉待制啟

方安遠郡遽奉賜環旋忝近班仰慚出綽未敘推先之

施首煩貽問之勤伏念某才非疎通器惟淺迫既與時
而寡偶遂造事以多窮小試勿堪大迷安用漸圖丘壑
敢望雲霄某官風烈匡時謀猷緯國入持筆橐嘗獻納
以盡規出布藩條更中和而樂職眷此迂愚之迹早陪
英邁之遊曲借揄揚遂令忝冒悵披風之尚邈愧染翰
之莫宣但祝保頤亟聞登拜

答李校書啟

伏審光膺宸命職列書林凡屬俊遊共欣榮問嘗謂西

崑冊府南極星躔集冠冕之名流實朝廷之妙選于此
養才而育德俾茂經綸豈徒較藝以程能務為華藻時
雖右武上急用儒厭馳馬試劍之言求說禮敦詩之士
肇開秘館廣集時髦既富之簡編使博其聞見以盡卓
約之守又淹之歲月使積其進修而期器業之成凡風
望之所加寔紀綱之攸賴進居廊廟必能熙帝載而亮
天工退處江湖亦可立懦夫而敦薄俗搜揚孰稱英特
是宜某官識度涵宏器資凝遠書開黃卷窮師友之本

原筆掃千軍見文章之戶牖進當清問罔伏嘉猷亟通
籍于金閨遂觀珍于玉海作史代言之任寔自此途澤
民致主之功式觀他日未遑慶牘遽辱華牋過形引重
之辭彌仰推先之義永言感抃莫罄指陳

答胡校書啟

上言伏審某官奧學窮源英詞揆藻未經險阻騁騶何
貴于駑駘既遇雪霜松柏遂殊于蕭艾今名莫掩舊物
斯還楚望九年不作劉郎之賦潮陽萬里應高韓子之

文雖暫屈于校讐方益觀于制作亨衢伊始清議畢歸
未遑修慶之儀先辱飛文之貺過形引重彌仰推先感
抃之深敷宣罔既

答錢待制啟

伏審光膺中詔還直西清公議稍伸士流交慶某官三
朝舊德一世偉人忠孝王家矧繼文儒之後安平泰日
己高法從之名嶢嶢多困于不全落落固知其難用江
湖遠迹屢易歲陰松柏後凋方騰月旦果動達聰之聽

俾歸持橐之班獻納是資職不分于中外典型未泯人
思見于老成俟聞環召之音那遂琳庭之逸念馳賤之
未果辱墜翰之遽先謙厚俯臨愧懷交集

答張寺丞啟

伏審光膺宸命分布邦條在仁人獲濟物之權于疲俗
有樂生之慶某官賦材肅給秉志堅剛權勢者人之所
趨吾獨奉公而弗畏貨財者衆之所欲吾能潔已而無
求政惟摩拊之先吏率廉平之化何屢書于上考而久

鬱于下僚天聽雖高月評難掩爰從九寺出將一同追
汲鄭之風流奚勞施設繼龔黃之績用行慶寵光未果
修書先承墜翰永言感悚曷既敷宣

赴永答衡守啟

祇奉誤恩俾臨舊治枕辭懇免蓋虞五技之窮優旨弗
俞曷慰十行之寵方鳩徒御將道封墉未遑竿牘以通
誠遽沐緘縢而敷眷某官端倪公望磊砢卿材擅豈弟
之仁聲受藩宣之重寄化行時雨下車早洽于歡謠刃

發新硎餘地已空于盤錯顧如頑陋加以憂衰欲尋一
壑以忘年豈謂專城而眷祿况乖泊養重興去魯之悲
嘗問為邦更激希顏之志遲瞻風度庶悉惓惓尚珍葆
于天倪用亟膺于帝寵

答任大夫啟

祇奉誤恩俾臨舊治露章丐免寔虞五技之窮被詔弗
俞仰媿十行之寵方戒徒御謹諏日辰未遑修篴記之
儀已先沐函封之祝某官德門濟美道韻垂成以智養

恬弗馳情于時競用和為貴常遠迹于衆紛茲聞寓止
之方將有披承之便其為欣幸曷罄名言更冀保調以
綏榮寵

謝曾漕吉甫啟

叨被除音俾分憂寄懇辭弗獲祇赴云初竊以學道而
愛人君子之事既得而患失鄙夫所為方今軍旅之興
惟是貢輸之急州郡經費已傾困焉其所以自支則必
犯詔條之所禁民氓資用殆竭澤矣而至于不已豈能

保根本之無虞某天稟迂踈衆嗤方拙憂傷之後志意
尤衰欲斂裳遠迹則未報上恩將枉己徇時乃大辱家
訓若為稱塞尚賴庇庥某官能宅道心務尊德性文章
足以鼓吹六藝業履足以冠冕諸儒共嗟煩使之久淹
彌歎冲襟之不競眷茲一道均仰惠綏豈特孤蹤獲逃
呵譴追陪尚邈企詠尤深

答邵守啟

昨甫外除亟承中命分符是寵還尋淡竹之仙共理非

良那有甘棠之愛貢忱辭而懇免辱優詔以遄征憂患
餘生支離病質雖幸託兩邦之好而未遑修一介之儀
某官資稟公忠戎昭整暇飛聲夷路功久著于百為受
寄專城譽已喧于五袴顧臨民之伊始欣託庇之弗遙
首辱惠音彌欽敦眷莫緣披晤尤劇瞻馳

答趙漕啟

某稟資甚拙處世多奇但信詩書之言不閑時習之態
叨塵末第將二十年竊廩太倉纔五六歲進不能高舉

遠引以希鴻鵠之遊退不能遠害全身而取牛羊之踐
常負愧恥况罹閔憂悲隙駟之易徂嗟林鳥之孰哺餘
生雖在諸念益頽敢謂新恩俾臨舊鎮五日遺愛曾何
有于甘棠二江清風尚依然于淡竹以孤露支離之質
牧呻吟凋瘵之民撫封未幾給日不暇雖鄉德而甚邇
欲馳書而尚淹某官宗室茂枝縉紳高選刺州總道推
潔廉公正之才援翰抽毫富組麗鏗鏘之製退居云外
公論弗咸惟是鄙人夙蒙異顧首貽音問報真乏于瓊

据心佩眷存篆乃同于鍾鼎

答李憲啟

禁省出綸誤蒙寵獎侯邦綰綬爰得舊遊自惟才業之
空疎每愧班資之超越主恩宜稱家業空存駒過隙以
難追烏集林而何哺僅終憂制仍負沉痾覺身慮之亡
聊支離已甚悵聰明之不及黽勉奚堪方圖仰籲于天
心庶獲俯從于人欲訪求大藥棲息小山萬里秋風眇
滄浪之釣影一犁春雨嗣臯壤之農歌弗逮控章已聞

錫命懇免惕俞音之閔奉承懷陳力之慙某官植操端
方抱忠昭徹妙年槐市高文獨掃于千軍廣問桂堂大
策復觀于三道安行素履自致清途以直繩參執憲之
聯由勁節受觀風之寄貴名愈白公論攸歸乃顧鄉情
復通年契雖山川攸遠瞻眉宇以濶然惟臭味所同借
齒牙而多矣愧馳書之不敏辱隆問以相先徒佩好音
豈云厚報

答梁潭州啟

伏審陞華秘殿擢昇中權除命初傳已聳列城之聽涓
辰既協同傾一道之瞻某官術略闓通材猷高邁考本
源而師友兼文武以弛張霜凜清秋肅邦刑于臺憲泉
流平地裕國計于軍興挺然公望之端倪卓爾卿材之
磊砢果膺宸眷更倚外庸粲然如列宿之拱太微屹乎
如長城之扞四國即觀報政別拜疏榮某患難餘生支
離病質謬忝于蕃之寄正依分閭之庥趨覲未緣向風
徒切其為欣仰曷罄敷陳

賀沈潭州啟

伏審帝制誕揚侯藩選建物議允推于時傑威聲已肅
于方隅某官自稟英材夙追前輩手披萬卷心期卓約
之歸筆掃千軍體絕浮華之尚三道對廣廷之大問一
鳴驚寰宇之同聲精思洞徹于幾微博識周知于治忽
以忠言嘉謨而出入禁闥以直道勁節而周爰咨詢疇
庸豈後于諸公詳試每淹于一面藩宣嶺表帖華夷遠
邇之情夾輔畿中作師帥表儀之冠更屈經綸之手來

蘇涸竭之氓在國計以甚疏聽民謠而大慰下車報政
即趨三節之嚴參鉉調元遂應六符之象某支離負疾
懇款投間尚闕允音意終期于一壑獲漸餘潤今復有
于二天欣幸為深敷宣莫既

答江簽判啟

鼓篋賢關嘗覩紫芝之面決科文陛同攀丹桂之枝一
睽邈于風猷遂恍迷于歲月遠勤墜翰良沃企悰某官
文儒發身器識致遠不為回翔而興歎行看簡拔而赴

時某材術無聞叨塵過分控章屢上祈養疾于山林接
袂猶賒徒寄懷于鱗羽願迪氣序更加保綏

賀范漕元作啟

伏審被命九宸觀風一道再受輸將之寄益思足國以
裕民屢持刺舉之權尤欲薦賢而剔蠹使華增重物議
同歸某官器識天資詩書家學負材能而擇所宜就守
義命而恥夫苟從劭農政于重湖事皆有指轉邦財于
五嶺民不知勞還對便朝上孚聰聽盍振鴻飛之漸猶

煩龍節之行竊計召除近在晨夕某夙聯德契乃託仁
封雖瀝懇投間未獲天從之欲而養痾藏拙正叨雲蔭
之私欣幸惟深敷宣曷罄

答處州陳倅啟

舊邦摻袂杳然魂夢之驚仙里停驂恍若年光之迅山
川回首笑語關心未果尺書以問安遽承一介而示貺
詞情交腆欽雅故之未忘推許太高豈迂疎之能副某
官靖共秉質炳蔚揆華早挹賢科見譽髦于庠序久淹

才業良稱屈于薦紳暫為別駕之行即慶廉車之選某
降才甚拙涉世無裨瀟水牧民空有懷于畫諾縉雲展
驥真不愧于題輿晤集正賒傾瞻尤切願言珍衛以迪
寵除

賀湖南鈞漕啟

來自日邊稱禮樂光華之選眷茲湖外獲仁賢刺舉之
公民物知歸山川改觀某官稟資明粹無事疏通蚤揚
歷于煩難尤飛騰于譽處郎潛向久使節尚勤問俗觀

風展孟博澄清之志裕民足國推士安取予之才諒不
俟于匪伊遂歸瞻于咫尺某叨居藩翰幸託部封欣仰
之私敷言奚究

答永倅啟

伏承光膺除命佐刺偏州亦既食瓜爰卜戒途之吉諒
惟行李克蒙坦道之祥某官圖史發身廉隅勵操合騫
翔于臚仕尚淹恤于遐方曾是迂愚謬分憂寄乃有為
僚之幸矧兼同里之仁雖輿或可題景辟蕃而不就然

驥之初展亮于統而能知更慎節宣即期披奉

答交代羅寺丞啟

伏審顯被楓綸再參竹契先驅漸邇合境同歸某官浣
彩詞江抽奇經笥賢關奮迅早登髦士之科夷路騰驤
益勵膚公之操遂由九寺出刺一同風猷凜凜而吏得
明師政術優優而民依嚴父某忽膺除目勦繼芳塵初
以小嫌勢難免赴遂緣疾病力懇投閒逮輸納職之誠
始報奉祠之命久紆高躅良負夙心至于局務之留行

且復軍須之滯運民雖粗息而帑則乏儲官有溢員而
軍多缺數方虞速戾何以告新遠辱飛文重令生愧災
威鼎盛徒御頗勤願必保綏以承華渚

謝湖北王漕東卿啟

頃緣多病上二千石之印章每愧無功叨三百廩之稍
廩仍美名于內閣分散局于殊庭某生則冥頑少而懶
惰承立庭之訓出赴事功叨持橐之聯入無報効朋友
誚往來之屑屑鬢毛紛黑白之斑斑固欲濯足滄浪冥

心霄漢泊再行于剖竹乃益困于負薪治慕潁川于得
民而何有政慚東海徒卧閤以奚為屢瀆天聰幸從人
欲貰其罷軟養以寬閒兩棹湘流若巨魚之縱壑一枝
衡阜如倦翼之投林方將繫釣艇于苔磯聽碁聲于花
院烹不材之鴈時訪故人換可愛之鵝聊從道士優游
樂歲涵泳聖時某官比玉純姿斷金久要賞奇文而析
疑義過從無俗調之談諧詠招隱而賦閒居述作有詞
人之風味身尚紆于簪佩志早抗于烟霞施及迂愚俾

逃顛躓更辱雙魚之贈來寧獨鶴之歸煥若丹青光于
蓬華某官氣冲而行粹本茂而言昌考厥源淵定商游
之可及追夫雅健奚崔蔡之足多乃留滯于江湖盡羽
儀于臺省如椽大筆鏤牒告功削札細書演綸出命是
為稱愜僊俟褒陞豈同癰瘁之人自屏支離之列北風
時厲南紀望遙悵詹覲以何緣敘悃悰而難盡願言珍
嗇少副傾祈

答湖北王運判啟

伏審顯被絲綸再將禮樂騰歡聲于愁嘆布皇澤于焦
枯某官德比圭璋言成黼黻坦蕩中涵之度溫恭表著
之儀見聞該洽于羣書器識周通于衆治使夷途布武
亦何往而不堪况昭代右文豈久遺而未錄乃滯江湖
之上數嬰芻粟之間承羽檄以哺軍師資毛錐以紀財
賦閔勞大雅其可再乎因任舊人直差易爾惟君子攸
居之職縈生民有瘼之心矧赤壁之上流經綠林之太
擾殘骸暴野猶聞肉視于遺黎剗股藥饑誰喜足音于

故國何止有露根之漸實當懷撥本之憂發儲積以振
流亡奚云黷戇糾愆違而褒忠善爰俟滂清即須美績
之昭遂慶寵靈之聚念茲羈旅居隸封疆有宅一區蕪
沒詎存于三徑崇墳四尺荒涼那置于萬家望古郢以
馳誠指今天而均庇和風扇物淑景對時願為光華精
加調衛

謝趙鹽啟

癸亥

秦淮枳棘初瞻棲鳳之標楚地江湖遠拜緘魚之貺悵

十四年之睽阻跂六百石之光華某官挺秀天支騰芳
朝路好古求是不傳鴻寶之書積思受經早卒浮丘之
業遂由鄉屬出總使權維斥鹵以阜商與摘山而通貨
雖名國計豈宜淹屈于雅猷行聽詔音自此翱翔于清
貫某性資鄙拙謀議迂踈久塵法從之聯効無尺寸叨
食殊庭之餼疾更支離白髮旋生壯懷將盡逐飛鳧于
渤海從斥鷃于蓬蒿尚辱記存過形問勞相望浩歎未
知披霧之期獨詠牢愁徒切向風之想益祈珍衛以對

寵光

答張桂陽啟

廬陵識面恍若一星衡阜向風忽傳雙鯉獲審竹符之
寵已臨桂水之陽某官擢秀賢科蜚聲朝路尚紆宏業
來試小邦地錯蠻徭爰藉安邊之畧民懼軍賦更資出
牧之仁復仰體于堯文亟繼修于商序子衿無刺城闕
同歸侯旆有光藻芹交采顧此拔豪之拙何增揭榜之
華竊揆惟良克勤宣化永言先民之事業必傳至學之本

源問居不吾知子路未逃于莞爾稱以其君伯夷吾猶
貶于怫然惟明道正誼不萌功利之心則致君澤民可
格唐虞之治是乃成均之首善據為稷下之遠猷某文
乏自嬉教無私淑獨喜聆于高誼因寄語于諸生虎卧
龍跳勿貴臨池之習金相玉質篲觀樂泮之風詹覲未
緣傾馳徒切願言珍衛以俟寵休

答高參議啟

欽誦旦評傳聞風旨未快青天之觀忽驚明月之投自

省迂愚何當眷屬某官望高東土譽重南金文副質以
彬彬行顧言而慥慥蓬壺仙籍方開碧海之津梁蓮幕
賓筵自適青油之談笑湛情懷于止水閱富貴于浮雲
逝係清規孰量遠步某用慚明效舍負素餐華髮漸生
寧復倚樓而看鏡塵纓未濯方將枕石而漱流尚餘蒿
目之憂不怠緇衣之好披瞻正阻向往良勤當三陽交
泰之昌時寔五福類升之吉會願調寢饋早被詔除

答朱鹽啟

桐江假守嘗傾舶趨之風衡阜僑居值攬輶軒之轡披
瞻未遂跂仰為勞某官迪德醇明受材肅給蜚聲夷路
序績昌時疇望寔之交孚付咨詢之重寄惟五嶺重湖
之南北如三湘九郡之封疆醴旅縱橫莽商隱屏比屋
但資于食飲大農深責于緡錢幾許官僚徯循公而刺
舉猗嗟閭里賴賦政以澄清想使指之敷宣慰輿情之
屬望功比臨淮之李名參折檻之游遂被寵靈益攄器
業某迂愚無用疾病相縈藏拙投閒粗適山林之性通

名莞記未遑竿牘之修先枉飛文可量愧汗亢陽滋久
微雨初殘願厚寢興少符頌祝

答劉帥啟

甲子

伏審光膺宸綽榮畀藩維除目初傳已聳士林之觀軺
車既下大歸民物之心一面得人三湘增重某官圭璋
粹質冠冕勝流早追吏部之高蹤篤于文行遠繼曲江
之稱首各有度程省戶羽儀曲臺縣蒞議論必期于尊
主持循不苟于隨時威鳳鳴岡允彰瑞應明珠照乘信

曰寶臣宜升禁密之司益慶忠嘉之告尚煩詳試以察
外庸清議畢歸貴名愈白某差池一羽俯仰七年蓬艾
卑飛自適鷦鷯之趣雲霄高跨方觀腰褭之遊幸此僑
居蔭于德宇敢圖謙厚先枉賁文益知久要之未忘惟
是永藏之為好

答孫判監啟

伏以荆臺故國夙聞耆舊之推衡阜僑居晚幸光塵之
奉懸衣自結冷突誰黔雖達者之能堪豈善人之宜爾

永懷先子好賢如緇衣矧有里仁赴義若飢渴因期出力薄助置錐作是念言既彌年所分華岳之半真仰愧于希夷寄草堂之貲僅免慚于錄事尚虞浼冒或取麾訶某官勁氣凌霜孤操聳壑學練熙朝之典故行追前輩之風流小試邊城譽即騰于襦袴倦遊末路身早掛于衣冠遠不離羣清而容物卜陶廬之三徑甘顏巷于一瓢恥同攘臂以受薪寧自曲肱而飲水義當難處必辭貨財之金禮或可從豈非道交之餽遂蒙虛受以詢

衆誠顧何力之有焉辱贈言而過矣枕流漱石平生已慕于子荆為黍穀雞繼此願從于荷蓀

答韓諫罷歲旦往來啟

伏奉誨函約停苛禮惟高情之所覺契卑悃之每懷良以病質支離野情疎放猿狙冠服掛思効于逢萌鼯鼠車輿懸欲睎于廣德既先後適投閒之願尚往來講交際之儀效官曹朴遫于泥塗比市利登趨于龍斷觀人且愧處已何堪只合藜杖葛巾弗期而遇東阡北陌乘

興即行未妨金玉之寶隣雅稱烟霞之道侶雖會名真
率難追西洛之遺風而遊曰逍遙請暢南華之高論三
陽交泰萬寶更新願綏福以鼎來亟承恩而晉接

答崇安詹令啟

丙寅

伏審銅章初綰已擇剛辰玉軫乍調深符興誦某官茂
資天稟美業世傳早知從政之方爰被承流之寄推心
及物諒期間里于安平積善在身行啟津途于遠大念
有維桑之敬方圖染楮之儀先枉飛文尤深愧抱

答江令賀冬啟

竹起英風既驗微陽之應日迎脩晷方崇亞歲之儀某
官天賦通才世推能吏學該百氏深窮述作之源氣蓋
萬人旁達弛張之畧尚淹驥足來試牛刀宜對令辰亟
膺殊獎時承慶問倍切感悰

答趙守賀年啟

王春建正寶曆授民柳色槐烟寅餞餘寒之氣椒花柏
葉欽崇嗣歲之儀某官天派清流朝紳雋望累分憂寄

名簡在于上心式聽歡謠德允諧于民望乘茲穀旦宜
對寵光某滯迹鄉關馳誠賓庠辱慶函之俯逮懷愧頌之
交深

答鄧倅柞啟

丁卯

昨者抗章有請引疾告休天憐寬宏畀孱生之後福山
樊間寂涵化日之餘輝某材甚液槁器惟瓠落少習詞
章之技徒以干名壯求忠孝之端詎能充實顧叨逾而
厚矣論功效以闕然矧迫疲羸寢顏榮望掛衣冠于神武

非慕昔人狎鷗鷺于滄洲姑從野性某官掞文而勵行
履信而資忠取友必端自致切磨之益與人為善更推
題品之公遠示好音有懷歸步搶榆鷗翼宜戢伏于一
枝擊海鵬程盍騫翔于萬里願慎保頤之節式膺寵目
之頒

答化州周守啟

某久欽雅望未緣夙霧之披正墮炎暉那有清風之濯
薰慈所軫華翰見貽誦味以還感銘難喻某涉道蹇淺

蒙榮叨逾進不能發策吐奇効忠嘉而致主退不能知
非補過希明哲以保身終朝之褫奪既行二紀之愆尤
斯信聖恩寬大未忍誅夷要服荒遐尚容省察禦魑是
職茹蠱何辭平日交游箝口姓名之道暮年形影灰心
贈答之篇踴躍晨昏茫茫寢飯非徒弃物尤是畸人敢
謂某官高誼鎮浮至仁敦厚垂愛閔于炎涼之外通殷
勤于隔濶之間織錦成章被糞牆而豈稱和鑒中齊駕
駕蹇以非宜竊承分符近比鄰壤氓庶已嗟于來暮藩

宣尤急于惟良豈但枯鱗漸清九河之潤要觀逸足騰驤千里之衢願厚節宣以酌瞻貺

自便謝政府及中司啟

青蠅止棘遠投魍魎之羣白骨成人俄戴乾坤之賜併還資秩安處丘園某識昧通方器非受大雖循途而平進奈得數之多奇逢時斯行豈有心于黨附不可則止冀無染于悔尤焉能貴身而賤名詎比隱居而求志回省昨夢塵勞半生西掖南宮持橐摠經于八月嚴陵瀟


岸分符併計于三年自餘寢飯之辰皆是退閒之日逮廩粟之弗繼知賜環之愈遙芝草山中希風綺李桃花源内接武劉郎不虞貴肆之遐蹤終掛賤拘之密網飛鳶跼處秋艸黃時渴肺生塵屢蹁躑而鑑井愁城對酒從酩酊以逃禪相彼炎荒允宜罪放戶牖盡蛛蝥之世界枕衾皆螻蟻之經行鈎吻叢羅人能采用蠱蛾翾舞食輒猜防大冬或至于衿絺長夏有時而附火病須謁鬼俗不貴醫俟以歲年之多淹茲惡弱之氣不必膏汙

于斧鑕固將反掩于纍裡苟非聖明輔以耆哲孰矜憐
其冤橫俾盡滌其疵瑕曾是摧顏有此僥倖某官秉心
公亮執德寬宏既攬時髦俾咸輸其功用又矜沉屈使
各遂其飛潛上臣之勲業方興多士之歸依初合致茲
丘壑亦在門闌某病以衰侵心隨力退開結廬之三徑
于以怡顏甘在巷之一簞求其樂地誓堅晚節少答隆
私某官中丞秉心端亮迪德公方奮由直道以受當陽
之知盡逐羣姦克勝執法之寄烏集府而不去鳳鳴岡

而屢聞傾否有功既力扶于大厦得人無競方兼引于
衆材稍淹風憲之司遂正鈞衡之拜益攄素業永固皇

基

上下
同前



斐然集卷七